

Dekretu Lei Nº 31/2009

Loron 18 Fulan Novembru

Estatutu Emar/Pesoal ba Servisu Migrasaun

Dekretu Lei nº 31/2008 hosi loron 13 fulan Agostu husu atu hari'i Servisu Migrasaun (SM) hanesan entidade ketak ida, hein deit ba Membru Governu responsavel/makaer ba lidun/area Migrasaun no hare'e Estatutu Pesoal ba Servisu Migrasaun ne'ebé hala'o iha lejislasaun rasik.

Atu implementa Lei Organika ne'e sei presiza hari'i Kareira ho rejime espesial ida, ho konsiderasaun ba prinsipiu hirak hosi Lei no Regulamentu ba Funsan/Kna'ar Publika, nune'e halo ajuste atu hatan ba konteudu fungsional no estrutura espesifika ba Servisu Migrasaun.

Nune'e, Governu dekreta/hasae, tuir alinea p) iha artigu 115 hosi Konstituisaun Republika iha artigu 28 hosi Dekretu Lei nº 27/2008, loron 11 fulan Agostu, atu sai folin nudar Lei, tuir mai ne'e:

Kapitulu I

Dispozisaun Jeral

Artigu 1

Objetu no Lidun Aplikasaun nian

1. Estatutu emar/pesoal ba Kareira servisu Migrasaun estabelese iha Diploma daudaun, tuir termu hirak iha nº 3 hosi artigu 41 Dekretu Lei 31/2008 .
2. Diploma hatan, rejime ba nomeasaun, promosaun, rekrutamentu, ingresu no salariu ka osan fulan.
3. Lei no Regulamentu ba Funsan/Kna'ar Publika aplika hamutuk iha Kareira Migrasaun hanesan adaptasaun

Artigu 2

Kategoria no Postu

1. Membru traballu hosi SM, fahe ba funionariu hosi Kareira Migrasaun no funionariu ba rejime jeral, tuir termu hirak iha artigu 38 Lei Organika hosi servisu Migrasaun (SM).
2. Kareira Migrasaun hada ka forma tuir orden dekresente/hatun iha ierarkia tuir mai ne'e:
 - a. Inspetor-Superior Migrasaun;

- b. Inspetor-Xefe Migrasaun;
 - c. Inspetor Migrasaun;
 - d. Inspetor-Adjuntu Migrasaun;
 - e. Oficial Migrasaun.
3. Postu ne'e hanesan pozisaun ne'ebé oficial okupa iha Kareira Migrasaun nia laran.
 4. Funsionariu ho kategoria ba Kareira la migratoria ne'ebé tur iha SM, tama iha dispozisaun Estatutu ba Funsun/Kna'ar Publika.

Artigu 3

Kuadru ba Emar/Pesoal

Governu estabele kuadru ba emar/pesoal SM, tuir estrutura ne'ebé haktuir iha Lei Organika ba SM no tuir mos ho Estatutu Funsun/Kna'ar Publika.

Artigu 4

Konteudu Funsional

1. Kareira Migrasaun hanesan Kareira ida ba rejime espesial, hari'i tuir termu hirak iha artigu 28 hosi rejime ba Kareira Funsun/Kna'ar Publika.
2. Konteudu funsional ba sistema postu Kareira hetan definisaun iha kapitulu ida-ne'e daudaun tuir ho nº 3 hosi artigu 14 rejime Kareira ba Funsun/Kna'ar Publika.
3. Emar/Pesoal Kareira Migrasaun hanesan detentor ba poder polisia nian iha Lei Imigrasaun no Azilu nia laran, no iha nia responsabilidade:
 - a) Buka kontrola ba ema ne'ebé tama no sai hosi postu fronteira;
 - b) Buka fo kumprimentu ba interdisaun ba ema ne'ebé tama no sai hosi postu fronteira;
 - c) Halo fiskalizaun ema nia prezensa no atividade hosi estranjeiru sira iha teritoriu nasional;
 - d) Halo instrusaun kona ba prosesu espulsaun administrativa;
 - e) Hala'o desizaun halo espulsaun administrativa no judicial;
 - f) Halo identifikaun no hala'o buka emar/pesoal, tuir termu hirak Lei haruka;
 - g) Halo fiskalizaun kumprimentu ba dispozisaun legal hirak kona ba rejistu ba alojamentu hosi estranjeiru;
 - h) Hala'o investigasaun ba krimi espesifikadu iha Lei Imigrasaun no Azilu, hanesan mos tulun ba imigrasaun ilegal, angariaun/subornu ba servisu nain, nune'e

mos krimi seluk kait ba malu la halakon kompeténsia ne'ebé fo ba autoridade seluk;

- i) Halo eskolta ba sidadaun estranjeiru ne'ebé haktuir iha desizaun ba repartrimentu;
 - j) Hala'ó kna'ar seluk ne'ebé dehan indispensavel atu hala'ó kna'ar nudar emar/pesoal Kareira Migrasaun.
4. Diskrisaun ba konteudu fungsional ba postu hosi Kareira Migrasaun hakerek iha aneksu 1 iha Diploma ida-ne'e no parte integrante.

Artigu 5

Asistencia Juridika

1. Desizaun ida ne'ebé haktuir hosi membru Kareira Migrasaun tuir ho Lei Imigrasaun no Azilu iha nia kna'ar regular nia laran, sei konsidera efeitu legal hotu-hotu hanesan desizaun ida hasae hosi Servisu Migrasaun, karik prosedimentu legal ne'e interpostu iha tribunal hasoru membru ida-idak.
2. SM fo asistencia juridika ba nia funsionariu sira ne'ebé presiza.

Artigu 6

Kolokasaun Emar/Pesoal

1. Oficial Kareira Migrasaun hein deit atu tau iha naran fatin ida iha teritoriu nasional ka ho akreditasaun iha apresentasaun oficial iha rai liur (esterior) tuir ho Estatutu Funsun/Kna'ar Publika.
2. Distribuisaun ba emar/pesoal iha estrutura organika SM nia laran ne'ebé hala'ó tuir despaxu hosi Diretor Nasional SM.

Artigu 7

Komisaun hosi Servisu hirak

1. Kargu hosi Diretor Nasional no Diretor Nasional Adjuntu SM hanesan nomeasaun tuir komisaun servisu nian, tuir konformidade ho Estatutu Funsun/Kna'ar Publika, espesial hosi rejime Kareira Funsun/Kna'ar Publika nian.
2. Ema sira ho rejime rekizisaun no hosi komisaun servisu SM, hadia nafatin direitu no privilejiu hirak hosi Kareira servisu baze/hun nian, tuir ho Estatutu

Funsaun/Kna'ar Publika, ho nomeasaun kona ba aprovasaun kategoria ninian rasik.

Artigu 8

Mobilidade

1. Mobilidade tuir prosedimentu kolokasaun, rotasaun no transferensia/troka fatin, nune'e mos kna'ar seluk iha fatin ida deit, ka kna'ar seluk iha fatin seluk iha rai laran.
2. Prinsipiu politika hosi mobilidade SM hanesan objetu ba regulamentu ne'ebe aprova tiha ona hosi Membru Governu makaer/responsavel ba lidun/area Migrasaun.
3. Hanesan determinante hirak ba dispozisaun mobilidade, no fator seluk tan iha nivel responsabilidade ba kargu, izolamentu ba fatin servisu no iha nia biban rasik, ida-idak no ofisial.

Artigu 9

Asistencia iha hela fatin

1. Responsabilidade hirak hosi SM tuir termu Lei haruka, husu dezempeñu kna'ar nian iha fatin dok no mesak iha rai laran.
2. Fo hela fatin diak tuir implementasaun politika ba mobilidade SM, no iha desizaun ba kolokasaun iha fatin do'ok no mesak nia laran.
3. SM bele hamentin osan ba orsamentu, atu suporta hela fatin ba ofisial no uma-kain sira ne'ebe hala'o servisu iha fatin ne'ebe susar atu hetan.

Artigu 10

Prosedimentu ba avaliasaun hosi dezempeñu

1. Avaliasaun ba dezempeñu hosi membru ba Kareira Migrasaun sei regula hosi rejime avaliasaun ba Funsaun/Kna'ar Publika, ho alterasaun ruma.
2. Atu halo efeitu ba dezempeñu rejime avaliasaun ne'e sei halo konsiderasaun ba Diretor Nasional hanesan dirijente maximu servisu nian, tuir termu hirak iha Lei nº 1 hosi artigu 18 Dekretu Lei 14/2008.

Artigu 11

Formasaun Profisional

1. SM hala'ó no implementa programa formasaun ida ba tinan ida nian no buka hala'ó, hodi bele hatan presiza hirak hatun hosi organizasaun.
2. Oficial SM iha dever atu tuir hotu atividade kona ba formasaun, liu-liu ba nia dezvoltamentu profisional.
3. SM bele fo lisensa ba estudu hanesan mos rejime flexivel ida, iha atribuisaun ba kna'ar oficial, hosi iniciativa privada hala'ó estudu progresaan presiza atu servisu.

Artigu 12

Distinsaun no Premiu

1. Halo distinsaun no Premiu hirak ne'ebé hare'e iha Estatutu Funsan/Kna'ar Publika, fo ba funsionariu SM nian ho meritu, tuir nia dezempeñu iha nia kna'ar.
2. Halo distinsaun no Premiu hirak ne'ebé hare'e iha numir 1 fo hosi Diretor Nasional ka Membru Governu makaer/responsavel ba lidun/area Migrasaun ho proposta hosi Diretor Nasional.
3. Prosesu ba identifikasaun oficial diak eh boot ho rekoñesimentu, iha servisu oi-oin ka premiu hirak ne'ebé temi iha numir kotuk, hanesan objetu ba regulamentu ne'ebé fo sai hosi Membru Governu makaer/responsavel ba lidun/area Migrasaun.

Artigu 13

Responsabilidade Disciplinar

1. Responsabilidade disciplinar hirak ba Kareira Migrasaun, buka hare'e iha Estatutu Funsan/Kna'ar Publika ho alterasaun ruma.
2. Bele mos aplika kastigu espesial ba funsionariu SM tuir mai ne'e:
 - a. Hakotu komisaun servisu;
 - b. Hakotu kontratu servisu provimentu;
 - c. Transferensia ka hasae hosi fatin.
3. Oficial ida bele hetan suspensaun preventiva ho vensimentu, wainhira bele konsidera presiza iha prosesu disciplinar nia laran.

Artigu 14

Kompetensia Disiplinar

1. Membru Governu makaer/responsavel ba lidun/area Migrasaun iha kompetensia atu tau/foti kastigu disiplinár naran ida.
2. Diretor Nasional no Diretor Nasional Adjuntu iha kompetensia atu tau/foti kastigu disiplinár naran ida ho repreensaun/siak no suspensaun maxima.
3. Xefe Sektor iha kompetensia besik ba nia funsionariu hodi bolu ka siak ho ibun no hakerek iha surat ho poder ba proposta hirak ne'ebé resin iha kazu.
4. Kastigu disiplinár ne'ebé hare'e iha numir kotuk, sei iha efeitu wainhira hetan aprovasaun hosi Diretor Nasional.

Kapitulu II

Dispozisaun kona ba Nomeasaun hirak

Artigu 15

Diretor Nasional

1. Diretor Nasional hatudu ka hili liu hosi konkursu tuir termu Estatutu Funsan/Kna'ar Publika.
2. Konkursu ne'ebé temi iha numir 1) sei taka rekezipu espesial ba nomeasaun tuir mai ne'e:
 - a. Iha situasaun ba asesu limitadu wainhira konkursu internu,sei husu postu Inspetor-Superior Migrasaun ka Xefe Migrasaun nune'e mos rejistu ida ba disiplina ezemplar;
 - b. Iha situasaun wainhira loke konkursu internu ba funsionariu publiku hotu-hotu,sei husu kategoria ba Tekniku –Superior grau A ka ekivalente/hanesan.
 - c. Iha situasaun konkursu publiku sei exiji ka husu kualifikasaun no esperiensia iha alinea a) no b);
3. Diretor Nasional foti ba komisaun servisu ida iha tinan hat nia laran no bele renova hikas ba periodu hanesan tuir Diploma hosi Membru Governu makaer/responsavel ba lidun/area Migrasaun.
4. Diretor Nasional hanesan kargu ida ba diresaun tuir termu nº 2 artigu 18 alinea b) Dekretu Lei 27/2008 no fo ba titular wainhira hala'o nia kna'ar ho direitu iha salariu no farda no mos diviza/insignia/emblema haktuir iha Dekretu Lei.

5. Wainhira nomeadu ba kargu Diretor Nasional simu mos dala ida Kareira Migrasaun ho postu ki'ik liu automatika kedas ba postu Inspetor-Superior Migrasaun.
6. Ho intensaun atu renova hikas fali komisaun servisu, sei hato'o ba interesadu liu hosi surat ho antesedensia minimu iha loron nennulu (60) molok remata nia periodu ba tinan hat.
7. Komisaun servisu hakotu automatika nia validade, karik Membru Governu makaer/responsavel ba lidun/area Migrasaun la intensaun atu renova hikas.
8. Komisaun servisu hosi Diretor Nasional bele hakotu iha naran biban ida liu hosi Diploma ministerial Membru Governu makaer/responsavel ba lidaun/area Migrasaun.
9. Artigu sei la perjudika aplikasaun ba norma ne'ebé haktuir iha dispozisaun tranzitoria ba Diploma ne'e.

Artigu 16

Diretor Nasional Adjuntu

1. Diretor Nasional Adjuntu hatudu hosi konkursu tuir termu Estatutu Funsau/Kna'ar Publika.
2. Konkursu ne'ebé temi sei taka rekezitu espesial ba nomeasaun tuir mai ne'e:
 - a. Iha situasaun ba asesu limitadu wainhira konkursu internu, sei husu postu Inspetor-Superior Migrasaun ka Xefe Migrasaun nune'e mos rejistu ida ba disiplina ezemplar;
 - b. Iha situasaun wainhira loke konkursu internu ba funsionariu publiku hotu-hotu, sei husu kategoria ba Tekniku –Superior grau B ka ekivalente/hanesan.
 - c. Iha situasaun konkursu publiku sei exiji ka husu kualifikasaun no esperiensia iha alinea a) no b);
3. Diretor Nasional Adjuntu foti ba komisaun servisu ida iha tinan hat nia laran no bele renova hikas ba periodu hanesan tuir Diploma hosi Membru Governu makaer/responsavel area Migrasaun.
4. Diretor Nasional Adjuntu hanesan kargu ida ba diresaun tuir termu nº 2 artigu 18 alinea c) Dekretu Lei 27/2008 no konsede/fo ba titular wainhira hala'o nia kna'ar ho direitu iha salariu no farda no mos insignia/emblema haktuir iha Dekretu Lei.
5. Wainhira nomeadu ba kargu Diretor Nasional Adjuntu simu mos dala ida Kareira Migrasaun ho postu ki'ik, ofisial ne'e liu automatika kedas ba postu Inspetor-Superior Migrasaun.
6. Artigu sei la perjudika aplikasaun ba norma ne'ebé haktuir iha dispozisaun tranzitoria ba Diploma ne'e.

Artigu 17

Kargu ba Xefe Sektor

1. Diretor Nasional tau ka foti ba kargu Xefe Sektor, ofisial ba Kareira Migrasaun ba postu Inspetor-Superior Migrasaun, hare'e tuir iha artigu 6.
2. Bele tau ofisial ho postu ki'ik ba Xefe Sektor, iha biban ne'ebé fo justifikasaun no ba periodu badak ka temporariu.
3. Ofisial ne'e iha direitu ba suplementu supervizaun, tuir termu artigu 51.
4. Artigu sei la perjudika aplikasaun ba norma ne'ebé haktuir iha dispozisaun tranzitoria ba Diploma ne'e.

Kapitulu III

Dispozisaun kona ba Promosaun hirak

Seksaun I

Dispozisaun Jeral ba Promosaun

Artigu 18

Promosaun hirak

1. Aseu ba postu ida iha Kareira Migrasaun liu hosi promosaun.
2. Promosaun hanesan transisaun ba postu as / superior ida iha eskala vertikal, simu kna'ar todan ba kompleksidade no responsabilidade.
3. Numir ba vaga/fatin-mamuk ba promosaun sei haktuir komformidade ho kuadru Pesoal hosi SM, karik iha kazu balun ne'ebé hare'e iha artigu 22 kona ba promosaun ho titulu esepsional.
4. Promosaun sei taka iha Jornal Republika.

Artigu 19

Kondisaun ba Promosaun

1. Kondisaun jeral ba promosaun defini iha Rejime konkursu ba Funsau/Kna'ar Publika no husik atu hatama kondisaun espesifika hirak ba Kareira rejime espesial.
2. Kondisaun espesifika ba Kareira Migrasaun hare'e difinisaun iha seksaun II iha kapitulu ida ne'e.
3. Ofisial kandidatu buka atu preenxe kondisaun jeral no espesial ba promosaun, ho esepisaun ne'ebé hare'e iha artigu 22 promosaun ho titulu esepsional.

4. Artigu sei la halakon aplikasaun ba norma ne'ebé haktuir iha dispozisaun tranzitoria ba Diploma ne'e.

Artigu 20

Modalidade ba Promosaun

1. Modalidade ba promosaun hanesan tuir mai ne'e:
 - a. Selesaun/hili ba Meritu;
 - b. Titulu Esepsional.

Artigu 21

Halo Promosaun ba Selesaun/hili tuir ho Meritu

1. Halo promosaun ba Selesaun/hili tuir ho Meritu hanesan demonstrasaun ba kapasidade, kualifikasaun, esperiensa, qualidade ema nian no avaliasaun ba folin hosi dezempeñu, fator hirak ne'ebé iha ponderasaun lolos tuir termu Estatutu Funsau/Kna'ar Publika, liu hosi evidencia ne'ebé iha no konsiderasaun ba kna'ar ne'ebé fo tuir postu.
2. Iha fatin-mamuk ka vaga barak liu ida, ba promosaun ba postu superior hala'o tuir orden sekuensial/tuir-malu ho preferensia ba prosesu ne'ebé hetan hosi selesaun/hili ba meritu.

Artigu 22

Promosaun ho titulu esepsional

1. Promosaun ho titulu esepsional hanesan asesu ba postu superior/as sei la depende ba existencia vakatura/fatin ne'ebé iha tempu balun mamuk hela no bele hetan iha kazu hirak ne'ebé tuir mai ne'e:
 - a. Wainhira hare'e iha promosaun ne'ebé haktuir iha numir 5 hosi artigu 15 no 16;
 - b. Wainhira prosesu rekursu ida resulta iha provimentu ka atu fo promosaun ne'ebé liu kedas ba implementasaun no prosesu selesaun/hili ba meritu;
 - c. wainhira ofisial ida ne'ebé ema bele hili ba promosaun no prosesu selesaun/hili ba meritu, maibe la hetan promosaun tamba prosesu disiplinár ka tara krimi sei halo arkivu ba prosesu ne'e la iha indikasaun ida atu impede/satan ofisial ne'e nia promosaun.

Artigu 23

Kondisaun Jeral ba Promosaun

1. Kondisaun Jeral ba Promosaun hetan definisaun iha Estatutu Funsau/Kna'ar publika no partikular iha konkursu ba rejime Funsau/Kna'ar Publika ho alterasaun hirak ne'ebé hare'e iha numir 2 artigu ne'e.
2. Oficial ida ho prosesu disiplinar ka tara krimi bele tuir prosesu selesaun/hili ida no hetan pozisaun ne'ebé bele hili ba promosaun tuir ordem meritu nian, maibe la bele hala'o promosaun wainhira sei tara hela kazu ne'e.

Artigu 24

Antiguidade

1. Antiguidade ba oficial postu Migrasaun ida sei kalkula hosi loron servisu efektivu sura hosi loron ne'ebé hala'o promosaun, nune'e sira ne'ebé hetan promosaun iha loron foin liu ba ne'e konsidera hanesan menus antigu.
2. Iha situasaun ne'ebé hala'o promosaun ba oficial barak iha prosesu selesaun/hili/hili mesak, oficial ne'ebé mak hetan valor ki'ik iha konkursu ba selesaun/hili sira ne'e sei konsidera hanesan menus antigu.
3. Oficial servisu-nain ne'ebé hetan promosaun iha periodu hotu-hotu, sei sura tuir efeitu kalkulu ba antiguidade iha postu, ho esepasaun tuir mai ne'e:
 - a. Iha tempu ba periodu ne'ebé mak oficial ne'e la hetan direitu ba vensimentu.
 - b. Iha tempu ba periodu ne'ebé iha suspensaun ba vensimentu tuir termu ba dispozisaun disiplinar, wainhira oficial ne'e hetan kulpa/sala.

Seksaun II

Kondisaun Espesial ba Promosaun

Artigu 25

Inspetor-Superior Migrasaun

Kondisaun ba ema ne'ebé aptu atu hili ba konkursu promosaun nian ba postu inspetor-Superior Migrasaun mak tuir mai ne'e:

- a. Sai titular ba postu Inspetor-Xefe Migrasaun, ho tinan rua servisu nian ho klasifikasaun *Diak liu* ka tinan tolu ho klasifikasaun *Diak* wainhira nia hala'o nia kna'ar; no
- b. Iha habilitasaun ho grau lisensiatuura ka hanesan.

Artigu 26

Inspetor-Xefe Migrasaun

1. Postu ba Inspetor-Xefe Migrasaun hanesan pontu ida ba asesu iha Kareira Migrasaun, ne'ebé mamuk ba kandidatu hosi liur/esternu.
2. Kondisaun ba ema ne'ebé aptu atu hili ba konkursu promosaun nian ba postu Inspetor-Xefe Migrasaun mak tuir mai ne'e:
 - A. Ba kandidatu hosi laran/internu:
 - i. Buka kompleta iha Kareira Migrasaun ho tinan rua servisu nian ho klasifikasaun *Diak liu* ka tinan tolu ho klasifikasaun *Diak* wainhira nia hala'o nia kna'ar; ka
 - ii. Iha habilitasaun ho grau lisensiatura ka hanesan.
 - B. Ba kandidatu hosi liur/esternu:
 - i. Iha habilitasaun ho grau lisensiatura ka hanesan.
3. Ba kandidatu hosi liur ne'ebé hili ba postu Inspetor-Xefe, hala'o servisu iha tinan ida nia laran hanesan prova, sei buka kompleta diak liu tan iha periodu ne'e nia laran ho programa ida ba estajiu Migrasaun.

Artigu 27

Inspetor Migrasaun

1. Kondisaun ba ema ne'ebé aptu atu hili ba konkursu promosaun nian ba postu Inspetor Migrasaun mak tuir mai ne'e:
 - a. Sei buka kompleta Kareira Migrasaun, ho tinan rua servisu nian ho klasifikasaun *Diak liu* ka tinan tolu ho klasifikasaun *Diak* wainhira nia hala'o nia kna'ar; no
 - b. Iha habilitasaun ho grau Baserelatu ka hanesan.

Artigu 28

Inspetor-Adjuntu Migrasaun

1. Postu ba Inspetor-Xefe Migrasaun hanesan pontu ida ba asesu iha Kareira Migrasaun, ne'ebé mamuk ba kandidatu hosi liur/esternu.

2. Kandidatu sira iha Diploma ida hosi pos-sekundariu ka hanesan atu bele tuir konkursu ba promosaun ba postu Inspetor Adjuntu Migrasaun.
3. Ba kandidatu hosi liur ne'ebé hili ba postu Inspetor-Xefe, hala'o servisu iha tinan ida nia laran hanesan prova, sei buka kompleta diak liu tan iha periodu ne'e nia laran ho programa ida ba estajiu Migrasaun.

Artigu 29

Ofisial Migrasaun

1. Postu Ofisial Migrasaun hanesan pontu atu tama iha Kareira Migrasaun.
2. Kandidatu sira iha Diploma ida hosi sekundariu ka hanesan atu bele tuir konkursu ba promosaun ba postu Ofisial Migrasaun.
3. Ba kandidatu hosi liur ne'ebé hili ba postu Ofisial Migrasaun, hala'o servisu iha tinan ida nia laran hanesan prova, sei buka kompleta diak liu tan iha periodu ne'e nia laran ho programa ida ba estajiu Migrasaun.

Kapitulu IV

Dispozisaun ba Rekrutamentu no Provimentu

Seksaun I

Dispozisaun ba Rekrutamentu

Artigu 30

Halo kualifikasaun ba rekrutamentu obrigatoriu

1. Iha nivel tolu mak nakloke atu tama ba kandidatu sira ba Kareira Migrasaun, liu-liu Ofisial Migrasaun, Inspetor-Adjuntu Migrasaun no Inspetor-Xefe Migrasaun.
2. Kualifikasaun hirak mak hakerek ona atu tama iha Kareira Migrasaun, mak hatudu iha okos, presiza hatutan tan ho rekizitu hirak mak hakerek ona hosi Estatutu Funsan/Kna'ar Públika:
 - a. Ba Ofisial Migrasaun:
 - i. Iha Diploma ida ki'ik liu mak sekundária, hatan ba Grau E hosi Aneksu II iha Rejime Kareira Funsan/Kna'ar Públika ka hanesan;
 - ii. No, iha koñesimentu boot kona ba lian ofisial ida, hanesan mos koñesimentu diak iha Lian Ingles: liu-liu Rona no Koalia.
 - b. Ba Inspetor-Adjuntu Migrasaun:
 - i. Iha Diploma ida ki'ik liu mak pós-gradusaun, hatan ba Grau D hosi Aneksu II iha Rejime Kareira Funsan/Kna'ar Públika ka hanesan;
 - ii. No, iha koñesimentu boot kona ba lian ofisial ida, hanesan mos koñesimentu diak iha Lian Ingles: liu-liu Rona no Koalia.

- c. Ba Inspetor-Xefe Migrasaun:
 - i. Iha Diploma ida ki'ik liu mak lisensiatura hatan ba Grau B hosi Aneksu II iha Rejime Kareira Funsan/Kna'ar Públika ka hanesan;
 - ii. No, iha koñesimentu boot kona ba lian oficial ida, hanesan mos koñesimentu diak iha Lian Ingles: liu-liu Rona no Koalia.
3. Karik iha klasifikasaun hanesan iha konkursu ba rekrutamentu, sei fo preferensia, ba kandidatu sira ne'ebé mak iha nivel akademiku boot, kandidatu feto sira no kandidatu sira ne'ebé mak iha koñesimentu diak kona ba lian ingles.

Artigu 31

Métodu atu Hili/Selesaun nian

1. Prosedimentu atu hili/selesaun hakerek ona iha Estatutu Funsan/Kna'ar Públika, hatutan tan ho prosedimentu hirak mak presiza no rekizitu hirak rasik hosi Kareira Migrasaun nian.
2. Husu liu-liu koñesimentu iha lian Ingles, nune'e prosesu hili/selesaun nian buka halo ezame formal ida kona ba lian ne'e.
3. Fo ba ezame ne'e, atensaun boot ba koñesimentu iha rona no koalia, hanesan mos ba koñesimentu iha leitura no hakerek.
4. Tan natureza hosi kna'ar ka servisu ne'ebé mak atu hala'o hosi Oficial sira Kareira Migrasaun nian, sei fo valor ba koñesimentu iha povu seluk no sociedade iha ezame kultural jeral nian, hanesan mos koñesimentu iha jeografia.
5. Wainhira la hatan ba métodu ruma hili nian ne'ebé mak hato'o ona iha numir 1, 2 no 3 sai nudar razaun atu hases kandidatu ida, rezultadu hirak métodu nian sei tau hamutuk, nune'e desizaun ba hili nian no publikasaun rasik ba rezultadu, sei fo sai deit iha rohan hafoin halo hotu métodu hili nian.

Artigu 32

Halo ezame médiku no Fíziku

1. Husu atu iha nivel ida diak hosi kapasidade fízika no rezisténsia ba kondisaun hirak atu dait eh kontajiu nian, nune'e buka atu hatene no trata kedas ba ameasa hanesan moras tuberkuloze.
2. Kandidatu sira ne'ebé mak hetan klasifikasaun suficiente iha prosesu hili/selesaun ba rekrutamentu iha Kareira Migrasaun, bele halo ezame fízika no médika hodi bele hare'e'e ninia kapasidade atu hala'o servisu Migrasaun no buka hatene situasaun ruma mak bele halo tratamentu.
3. Kandidatu ida ne'ebé mak hatan ho diak ba ezame médiku no fíziku hakerek ona iha artigu ida-ne'e, bele hases hosi prosesu rekrutamentu nian.

4. Ezame hirak kona ba aptidaun médika no fízika iha konteudu, orientasaun no tabela laiha aptidaun rasik, tuir ho regulamentu atu aprova hosi membru Governu responsavel/makaer ba lidun/area Migrasaun nian.

Artigu 33

Estatutu hosi Estajiaru iha Kareira Migrasaun

1. Iha periodu halo prova atu tama iha Kareira Migrasaun, ema rekruta sira iha estatutu nudar Estajiaru.
2. Rekruta sira ne'ebé mak iha ligasaun ba Funsan/Kna'ar Públika iha loraun halo rekrutamentu, sei transfere ho estatutu hosi Estajiaru iha Kareira Migrasaun, iha ámbitu komisaun estraordinaria servisu nian, tuir ho termu hirak hosi Estatutu Funsan/Kna'ar Públika.
3. Rekruta sira ne'ebé mak iha ligasaun ba Funsan/Kna'ar Públika, sei hetan mos periodu halo prova ba Kareira Migrasaun, tuir ho Rejime hosi Kareira Funsan/Kna'ar Públika nian.
4. Rekruta sira ne'ebé mak laiha ligasaun ba Funsan/Kna'ar Públika, sei asina kontratu administrativu ida provimentu no hetan estatutu nudar Ajente Administrativu.
5. Periodu halo prova hosi Kareira Migrasaun iha durasaun fulan 12.
6. Periodu halo prova bele hakotu iha klaran molok to'o iha prazu ne'ebé temi ona iha numir ida kotuk, naran katak superior hare'e'e katak laiha perspetiva real ida hosi Estajiaru hodi hatudu nia bele duni hatan ba rekizitu hirak hosi kargu ne'ebé nia kandidata ba, to'o remata prazu fulan 12 ne'ebé tau ona.
7. Estajiaru ne'ebé mak laiha kapasidade atu hatan ba rekizitu hirak hosi periodu halo prova nian, sei labele tama iha Kareira Migrasaun no sei hakotu keda ninia kontratu administrativu provimentu nian; ka karik estajiaru ne'e nudar Funsanariu Públiku, sei hakotu keda komisaun esepsional servisu nian, nune'e funsionariu ne'e fila hikas ba ninia ajénsia uluk maibe nia sei la lakon direitu ka privilejiu hirak mak hetan ona.

Artigu 34

Dispozisaun kona ba estajiu

1. Estajiu Migrasaun hatan ba faze ida formasaun teorika no faze ida-seluk formasaun pratika, ho durasan tomak fulan 12.
2. Iha faze teorika ne'ebé temi ona iha numir ida kotuk ne'e bele fo hosi Sentru Peskiza no Planeamentu Migratoriu, ka liu hosi instituisaun akademika ida ho rekoñesimentu rasik.

3. Husu atu hala'ó Estajiu Migrasaun to'ó nia rohan, hanesan kondisaun obrigatoria hodi halo promosaun ba postu ida hosi Kareira Migrasaun.
4. Kurikulu no programa ba Estajiu Migrasaun sei hakerek liu hosi Norma Prosedimentu atu fo sai hosi Diretor Nasional.

SEKSAUN II

TAMA

Artigu 35

Tama no halo promosaun

1. Iha Programa Estajiu Migrasaun nia rohan Diretor Nasional buka hanoin atu halo avaliasaun jeral ba dezempeñu hosi Estajiaru no hato'ó ninia desizaun kona ba hatan ka la'e, ba rekizitu hirak iha periodu halo prova nian.
2. Estajiaru ida ne'ebé mak hatan ho diak ba rekizitu tomak iha periodu halo prova nian, bele hetan nomeasaun atu tama iha Kareira Migrasaun, iha postu Ofisial Migrasaun, Inspetor-Adjuntu Migrasaun ka Inspetor-Xefe Migrasaun tuir ho konkursu ne'ebé hala'ó ona ba ninia prosesu hili rasik, maibe sei hare'e'e ba fatin mamuk mak iha ba.
3. Wainhira numir estajiaru ne'ebé hatan ho diak ba periodu halo prova nian, boot liu numir hosi fatin mamuk mak iha, sei fo liu preferensia atu tama ba Estajiaru sira ne'ebé mak hetan klasifikasaun boot liu iha Estajiu Migrasaun nia laran.
4. Estajiaru sira seluk mak la hetan nomeasaun ida tuir ho termu hirak iha numir 2 no 3, sei tau sira iha lista hein nian tuir ho orden klasifikasaun iha estajiu hosi leten mai kraik, ba efeitu atu tama kleur, nune'e sira hela iha lista ne'e hosi prazu fulan 12 sura hosi loron hakotu estajiu.
5. Iha periodu fulan 12 nia rohan, remata validade estajiu nian, ba efeitu atu tama iha Kareira Migrasaun.

SEKSAUN III

HALO DESTAKAMENTU BA ADIDU MIGRASAUN

Artigu 36

Adidu Migrasaun

1. Ministru Negosiu Estranjeiru bele, ho proposta hosi Membru Governu Responsavel/Makaer ba lidaun/area ba Migrasaun, halo nomeasaun no fo fiar

- ba Adidu Migrasaun, atu hala'ó kna'ar iha rai liur no organizasaun internasional mak fo autorizasaun ba nia, ne'ebé mak haruka ba embaixada, misaun Diplomatika no konsuladu Timor-Leste nian.
2. Halo nomeasaun ba Adidu Migrasaun liu hosi rejime Destakamentu, ba periodu tinan 2, mak bele hanaruk hikas ba periodu hanesan, tan razaun urjensia ka konvieniensia hosi servisu.
 3. Iha despaxu hosi nomeasaun buka hatama konteudu fungsional kona ba kna'ar ba Adidu Migrasaun, ne'ebé mak prezisa konsidera ba efeitu legal tomak nudar kna'ar Migrasaun nian.
 4. Kondisaun hirak servisu nian hosi Adidu Migrasaun, hanesan mos kona ba kustu assisténsia médika ba adidu no ninia familia, ajuda kustu, suplementu no benefisiu hirak seluk, prezisa tau hanesan ho Oficial sira tuir nivel mak bele kompara iha Kareira Diplomatika hosi Ministeriu Negosiu Estanteiru.
 5. Ministru Negosiu Estanteiru no Membru Governu Responsavel/Makaer ba lidun/area Migrasaun fo autorizasaun atu hala'ó kna'ar iha organismu internasional tuir ho termu hirak hosi Estatutu Funsau/Kna'ar Públika, hosi funsionariu sira membru SM nian mak hatudu ka konkore ba organizasaun hirak ne'e.

KAPITULU V

REJIME SALARIU NIAN

SEKSAUN I

DISPOZISAUN JERAL

Artigu 37

Objetu no Ámbitu

1. Rejime salariu ba Kareira Migrasaun tau salariu baze hatan tuir ho postu ida-idak hosi Kareira Migrasaun nian.
2. Rejime ne'e mos bele aplika ba kargu hirak hosi diresaun SM nian hanesan mos ba Estajariu sira mak tuir hela Estajiu Migrasaun.
3. Funsionariu sira seluk hosi SM hosi rejime jeral funsau/kna'ar públika ka iha rejime hosi komisaun servisu, la tama iha rejime ida-ne'e.

Artigu 38

Direitu ba remunerasaun/salariu

1. Ofisial sira hosi Kareira Migrasaun iha direitu ba salariu no suplementu hirak, tuir ho buat ne'ebé mak hakerek ona iha lei, hahu hosi lora halo promosaun ba postu rasik.
2. Estajiaru sira ba Estaju Migrasaun iha direitu ba salariu no suplementu hirak sura hosi lora hahu estaju nian.
3. Estajiaru sira iha lista hein ba nomeasaun kleur, mak hakerek ona iha artigu 35 numir 4 no 5, laiha direitu ba salariu ka suplementu, wainhira sira hein nomeasaun ba Kareira.
4. Remunerasaun selu fula-fulan.
5. Ofisial sira iha direitu ba salariu no suplementu hirak, wainhira hetan justifikasaun hosi desizaun disiplinar ka hosi Lei seluk mak bele aplika.
6. Direitu ba remunerasaun remata wainhira hare'e'e kauza ruma atu hakotu ligasaun/vinkulu juridika ho SM mak hakerek ona iha Diploma legal iha vigor.

SEKSAUN II

SALARIU

Artigu 39

Vensimentu ba Kargu hirak Diresaun nian

1. Kargu hirak hosi diresaun iha SM mak hanesan Diretor Nasional no Diretor Nasional Adjuntu.
2. Vensimentu hosi Diretor Nasional no Diretor Nasional Adjuntu, la'o tuir ho buat hirak mak hakerek iha Rejime Kareira hosi Funsun/Kna'ar Públika, maibe mak hatan ba Diretor Nasional no Diretor Distrital sira rasik.

Artigu 40

Sistema Remuneratoriu

Sistema remuneratoriu hosi SM forma hosi remunerasaun baze, hatutan tan ho subsídiu, suplementu no abonu.

Artigu 41

Remunerasaun baze

1. Salariu baze fula-fulan kalkula tuir ho formula:

$V = I_n \times V_a$

Hatan ba: V= Vensimentu, I_n = Indise; no V_a = Variavel

2. Variavel (V_a) tau eh taka liu hosi dekretu ne'ebé halo hamutuk hosi Membru Governu Responsavel/Makaer ba lidun/area Migrasaun no Ministru Finansas.

Artigu 42

Eskala Remuneratoria

1. Atu halo efeitu ba determinasaun salariu ne'ebe hakerek iha artigu 2, ba postu ida Kareira Migrasaun nian iha eskala ida remuneratoria konforme Aneksu II iha Diploma dadaun ne'ebe nia halo parte.
2. Postu Kareira Migrasaun hatan grau, indise vensimentu hirak ba kareira Funsan/Kna'ar Publika tuir mai ne'e:
 - a. Inspetor-Superior Migrasaun, hetan eskala ida ho 5 indise ne'ebé hatan hosi 6^o no 10^o Grau B hosi Rejime Kareira Funsan/Kna'ar Publika;
 - b. Inspetor-Xefe Migrasaun, hetan eskala ida ho 5 indise ne'ebé hatan hosi 1^o no 5^o Grau B hosi Rejime Kareira Funsan/Kna'ar Publika;
 - c. Inspetor Migrasaun, hetan eskala ida ho 7 indise ne'ebé hatan ba indise Grau C hosi Rejime Kareira Funsan/Kna'ar Publika;
 - d. Inspetor-Adjuntu Migrasaun, hetan eskala ida ho 7 indise ne'ebé hatan ba indise Grau D hosi Rejime Kareira Funsan/Kna'ar Publika;
 - e. Oficial Migrasaun, hetan eskala ida ho 7 indise ne'ebé hatan ba indise Grau E hosi Rejime Kareira Funsan/Kna'ar Publika;
3. Atualizasaun indise vensimentu ba tabela Rejime Kareira Funsan/Kna'ar Publika halo efeitu automatika hanesan Aneksu II iha Dekretu dadaun;

Artigu 43

Renumerasaun ba Estajiaru sira

Estajiaru ne'ebé frekuenta Estajiu Migrasaun iha direitu ba renumerasaun baze ida ne'ebé hatan ba 75% hosi salariu postu, eskalaun 1, ne'ebé konkore no frekuenta periodu ne'ebé hala'o prova.

Artigu 44

Efeitu Promosaun ba Renumerasaun

Ofisial kareira Migrasaun ne'ebé halo promosaun ba postu superior ida, sei selu nudar eskalaun 1 postu ne'ebé halo promosaun.

Artigu 45

Prograsaun

- 1) Prograsaun salaral iha eskala ida ba vensimentu, sei kondisiona iha periodu tempu ida nia laran no avaliasaun ba nia dezempeñu.
- 2) Prograsaun sei hala'o servisu ba tinan tolu ho avaliasaun dezempeñu ho klasifikasaun *Diak* ka superior.
- 3) Ba atribuisaun klasifikasaun *Diak Liu* ho avaliasaun dezempeñu, iha tinan rua tuir malu nia laran, hatun ba tinan ida periodu tau ona ne'ebé temi iha numir kotuk.
- 4) Hare'e tiha rekizitu ne'ebe temi iha numir 1 no 2 artigu ne'e daudaun, servisu kompetente bele hala'o mudansa ba eskalaun tenki halo rejistu ba prosesu mesak ida funsionariu nian.
- 5) Direitu ba renumerasaun eskalaun superior hare'e iha loron uluk fulan tuir mai ba preenximentu rekizitu ne'ebé temi iha numir 2 ka 3.

Seksaun III

Suplementu Salarial hirak

Artigu 46

Suplementu ba Kareira Migrasaun

- 1) Oficial ba Kareira Migrasaun, iha direitu ba suplementu ne'ebé hakere iha Estatutu Funsau/Kna'ar Publika, no iha direitu atu simu suplementu espesial ne'ebé hakotu iha deketu ne'e.
- 2) Suplementu Kareira Migrasaun selu tuir rekoñesimentu ba kondisaun espesifika ba servisu Kareira Migrasaun ho konsiderasaun ba disponibilidade no permanente nia membru, risku ba kna'ar, moras ho kondisaun traballu no hela fatin, servisu husu iha fatin dok no fuik.
- 3) Suplementu espesial ba Kareira Migrasaun tuir mai ne'e:
 - a. Subsidiu ba alimentasaun;
 - b. Subsidiu ba Transporte;
 - c. Suplementu ba izolamentu;
 - d. Suplementu ba servisu iha rejime turnu; no
 - e. Suplementu supervizaun.

4) Estajiaru ba Programa Estaju Migrasaun, la iha direitu ba suplementu Kareira Migrasaun, maibe hadia nafatin Suplementu ne'ebé temi iha Estatutu Funsau/Kna'ar Publika.

5) Folin ba hela fatin ba nomeasaun uluk ba fatin uluk estaju migrasaun sei buka hamentin hosi estajiaru sira.

Artigu 47

Subsidu ba Alimentasaun

- 1) Oficial ba Kareira Migrasaun ho kna'ar migratoria iha direitu ida atu simu subsidu ba alimentasaun , karik nia hetan tulun hosi servisu.
- 2) Subsidu ba Alimentasaun seluk hosi loron ne'ebé nia hala'o servisu.
- 3) Subsidu ba Alimentasaun laos wainhira nia hetan moras ka kumprir pena ba suspensaun disiplinar ka buka prevene hela suspensu ba tempu ne'ebé nia iha situasaun ne'e.
- 4) Subsidu ba Alimentasaun sei selu hamutuk ho vensimentu.
- 5) Folin ba subsidu mensal ka fulan nian sei taka hosi Dekretu Governu.

Artigu 48

Subsidu ba Transporte

1. Oficial ne'ebé hosi kna'ar Migratoria no servisu efetivu iha direitu ida ba subsidu ba transporte.
2. Subsidu ba transporte seluk fula-fulan ho folin dolar sanulu resin lima.

Artigu 49

Suplementu ba Izolamentu

1. Oficial Kareira Migrasaun ne'ebé hala'o servisu iha postu fronteira hela dok hosi Distritu Dili, iha direitu Suplementu ba Izolamentu.
2. Suplementu ba Izolamentu sei kalkula ho presentajem 25% ba renumerasaun baze postu Inspetor Adjuntu hosi Eskalaun 1.
3. Suplementu ba Izolamentu ne'ebé fahe fula-fulan hosi tempu periodu ne'ebé nia hala'o nia dever hirak iha postu neba.
4. Suplementu ba Izolamentu ne'ebé haktuir iha numir kotuk artigu ne'e, bele hatun wainhira Governu tau hela fatin ba nia funsionariu no uma-kain sira.

Artigu 50

Suplementu ba servisu iha rejime turnu

1. Bele husu ba Oficial Kareira Migrasaun prestasaun servisu ba rejime turnu.
2. Pozisaun ne'ebé hatene hanesan hala'o iha rejime turnu haktuir hosi despaxu Membru Governu Responsavel/Makaer area Migrasaun.
3. Iha biban ne'ebé ho justifikasaun no temporaria, Membru Governu Responsavel/Makaer ba lidun/area Migrasaun bele halo nomeasaun ba fatin seluk ba efeitu rejime turnu sei hatama fatin ne'ebé temi iha numir 2.
4. Suplementu sei selu hosi traballu rejime turnu, sei haktuir iha Diploma hosi Membru Governu Responsavel/Makaer ba lidun/area Migrasaun, ne'ebé sei halo folin wainhira taka ona Dekretu hosi Governu ba Estatutu Funsun/Kna'ar Publika.

Artigu 51

Suplementu ba Supervizaun

1. Kargu SM ne'ebé hili ba Suplementu ba Supervizaun hanesan Xefe Setor, Xefe Divisaun ka Unidade hanesan no oficial senior responsavel/makaer turnu ka postu fronteira.
2. Suplementu Supervizaun hanesan kompensasaun renumeratoria ho responsabilidade ne'ebé dait ba kna'ar supervizaun hosi membru SM ida, sei nomeadu ba kargu ne'ebé hare'e iha estrutura organika hosi SM.
3. Suplementu sei selu fula-fulan no depende ba nia kna'ar efetivu ne'ebé hala'o.
4. Wainhira Oficial hosi membru SM, hala'o nia lisensa ba ferias, hetan baixa tamba moras ka lisensa seluk ne'ebé la iha direitu ba pagamentu suplementu ba supervizaun.
5. Suplementu ba Supervizaun sei kalkula ho presentajem 15% ba renumerasaun baze postu oficial hosi Eskalaun 1.
6. Pagamentu ba suplementu sei halo efeitu wainhira hala'o ona implementasaun estrutura SM.

Kapitulu VI

Dispozisaun Tranzitoria

Artigu 52

Rejime Tranzisaun

1. Iha biban ne'ebé hari'i SM, funsionariu hotu-hotu hosi PNTL ne'ebé hala'o servisu iha Departamentu Migrasaun tama ba funsionariu SM, tuir termu dispozisaun tranzitoria.
2. Funsionariu ne'ebé tranzita hosi PNTL ba SM, sei kaer nafatin kargu ne'ebé lori no hein hela dezisaun ne'ebé hakotu iha dekretu ida ne'e.

3. Funsionariu ne'ebé temi iha numir 1) sei tama iha SM tuir termu ne'ebe hakotu hosi komisaun servisu esepsional.
4. Periodu Tranzitoria sei hafolin ho prazu maximu tinan lima nia laran.
5. Sistema postu no regulamentu ho relasaun ba PNTL, sei la fo efeitu iha SM, wainhira remata periodu tranzitoriu hato'o hosi dekretu ne'e.
6. Dispozisaun hirak hosi kapitulu ida-ne'e sei la fo efeitu, iha periodu tranzitoriu nia rohan.

Artigu 53

Dispozisaun Tranzitoria hosi Emar/Pesoal

1. Fo oportunidade atu hili, ba detentor iha postu ida hosi PNTL mak hala'o daudaun kna'ar iha SM, atu fila hikas ba PNTL ka atu kontinua nafatin iha Kareira Migrasaun.
2. Halo tranzisaun hosi kareira PNTL ba kareira Migrasaun, sei hala'o liu hosi prosesu ida Rekonversaun Profisional, tuir ho artigu 13 hosi Dekretu-Lei 27/2008.
3. Oficial ne'ebé mak konkore ba Rekonversaun Profisional iha postu ida Kareira Migrasaun, sei konsidera hanesan hili ba Kareira Migrasaun, tuir ho termu hirak hosi numir 1 iha artigu ida-ne'e.
4. Oficial ne'ebé mak la konkore, eh la hetan susesu iha prosesu rekonversaun profisional, sei transfere ba PNTL iha periodu tranzitoriu nia laran tuir ho termu hirak hosi numir 2 hosi artigu ida kotuk.

Artigu 54

Programa ba Rekonversaun Profisional

1. Programa Rekonversaun Profisional nakloke ba funsionariu hotu-hotu PNTL, mak iha ligasaun ho Departamentu Migrasaun eh Servisu Migrasaun ho tempu liu fulan 12, iha tinan rua kotuk molok loke prosesu Rekonversaun Profisional.
2. Programa Rekonversaun Profisional hala'o liu hosi konkursu internu ida mak hatu'ur iha méritu, forma hosi métodu hirak tuir mai ne'e:
 - a. Halo avaliasaun profisional, tuir ho termu hirak hosi Dekretu-Lei 14/2008;
 - b. Halo avaliasaun ba Kurikulum, tuir ho termu hirak hosi Dekretu-Lei 34/2008; no
 - c. Halo entrevista, tuir ho termu hirak hosi Dekretu-Lei 34/2008.

Artigu 55

Impaktu hosi Prosedimentu Disiplinar

Iha periodu tranzitoriu nia laran funsionariu hotu-hotu ho kna'ar migratoria sei hatan ka hakru'uk ba avaliasaun disiplinar hodi bele determina katak bele hili atu halo Rekonversaun Profisional ba iha postu ida hanesan ka superior, tuir ho termu hirak hosi regra jeral mai ne'e:

- a) Iha fulan 12 ikus liu ba Rekonversaun Profisional, Ofisial hosi Imigrasaun PNTL labele hetan kondensasaun ba kastigu disiplinar multa ka superior;
- b) Ofisial hosi Imigrasaun PNTL labele hetan kondensasaun ba dadur efetiva, iha ámbitu prosesu krimi nian.
- c) Ofisial hosi Imigrasaun PNTL presiza hetan sertifikadu provizoriu ka hetan sertifikasaun ikus hosi UNMIT.

Artigu 56

Prosesu Disiplinar ka Kriminal mak tara hela (Pendente)

1. Ofisial ho prosesu disiplinar ka kriminal ida mak tara hela (pendente) bele konkore ba prosesu ida Rekonversaun Profisional no hetan pozisaun ida hatu'ur iha méritu, maibe labele hetan promosaun ba postu ida hosi Kareira Migrasaun, wainhira kazu ne'ebé temi ona sei tara hela (pendente).
2. Karik prosesu pendente mak la hakotu iha periodu tranzitoriu nia rohan, sei aplika regra hosi n^o 4 iha artigu 52.

Artigu 57

Halo promosaun ba Ofisial Migrasaun ka ba Inspetor-Adjuntu Migrasaun

1. Funsionariu sira hosi Migrasaun PNTL ho postu nudar Ajente no iha tempu servisu minimu tinan 4 iha Departamentu Migrasaun hosi PNTL ne'ebé taka ona nia laran, no mos la hases hosi artigu 55, bele hili atu konkore ba Rekonversaun Profisional iha postu Ofisial Migrasaun ka Inspetor-Adjuntu Migrasaun, naran katak:
 - a) Iha diploma ida validu hosi Hanorin (Ensinu) Sekundariu kompletu;
 - b) Hakotu ho klasifikasaun diak kursu baziku ida Migrasaun nian;
 - c) Hakotu kursu intermediu ida Migrasaun nian ka asaun seluk hosi formasaun relevante.
2. Ofisial sira mak la hatan ba buat ne'ebé hakerek ona iha alinea a) hosi numir 1 bele kontinua nafatin iha SM iha tinan 5 periodu tranzitoriu nia laran, prazu ne'ebé mak uza atu kompleta rekezitu akademiku hirak mak presiza.

3. Karik Oficial ruma mak temi ona iha numir 2 la hatan ho ksolok ba rekizitu akademiku hirak to'o periodu tranzitoriu nia rohan, sei aplika regra hosi numir 4 iha artigu 52.

Artigu 58

Halo promosaun ba postu superior

1. Diretor hosi Departamentu Migrasaun no Sub-Diretor oras ne'e daudaun, bele konsidera hafoin halo rekerimentu, ba Rekonversaun Profisional, liu hosi halo promosaun ba Postu Inspetor-Superior Migrasaun.
2. Oficial sira ho tempu servisu minimu fulan 12 nudar Xefe sektor, iha tinan 2 liu ba, bele hafoin hetan promosaun ba Oficial Migrasaun ka Inspetor-Adjuntu Migrasaun tuir ho termu hirak hosi artigu kotuk ne'e, konkore ba atu hetan promosaun ba postu Inspetor-Xefe Migrasaun no Inspetor-Superior Migrasaun.
3. Oficial sira seluk mak hetan ho ksolok Rekonversaun Profisional iha postu Oficial Migrasaun ka Inspetor-Adjuntu Migrasaun, bele konkore ba atu hetan promosaun ba postu Inspetor Migrasaun no Inspetor-Xefe Migrasaun.
4. Halo promosaun sei hare'e'e liu ba méritu, tuir ho buat hirak mak hakerek ona iha Kapitulo III.

Artigu 59

Nivel emar/Pesoal nian

Numir kona ba fatin mamuk iha postu ida-idak mak sei mamuk atu prienxe iha periodu tranzitoriu nia laran, sei determina haktuir ho kuadru emar/pesoal ne'ebé hakerek ona iha artigu 3 hosi dekretu ida-ne'e.

Artigu 60

Impaktu hosi Rekonversaun Profisional

Kandidatu sira mak liu iha prosesu Rekonversaun Profisional:

- a. Sei fo salariu no eskalaun tuir ho grau hanesan ka superior;
- b. Iha ninia antiguidade iha Kareira Migrasaun ne'ebé hakerek ona iha termu hirak hosi artigu 24;
- c. Sei la tuir periodu fulan 12 halo prova nian, mak hakerek ona iha Estatutu Funsau/Kna'ar Públika nian;

- d. Sei fo rekoñesimentu ba sira katak hakotu duni Estajiu Migrasaun mak hakerek ona iha dekretu ne'e;
- e. Sei konsidera katak sira liu hosi kareira PNTL ba kareira Migrasaun;
- f. Sei fo rekoñesimentu ba sira kona ba tempu servisu efetivu ne'ebé hala'o iha PNTL hanesan tempu servisu efetivu ne'ebé hala'o iha Funsau/Kna'ar Públika.

Artigu 61

Responsabilidade hosi PNTL

- 1. Departamentu hosi Rekursu Ema (Umanu) PNTL hamutuk ho Divizaun hosi Rekursu Ema (Umanu) SM, sai nudar responsavel iha prosesu Rekonversaun Profisional nia laran hodi:
 - a. Fo lista ida ema/pesoal atualizada ho pozisaun atual hosi postu ida-idak;
 - b. Fo lista ida hosi Oficial sira imigrasaun PNTL nian, mak hatan ba kriteriu hirak hosi artigu 57;
 - c. Fo prosesu individual hosi Oficial sira tomak PNTL mak konsidera katak bele hili atu halo Rekonversaun Pofisional no halo promosaun iha Kareira Migrasaun;
 - d. Fo lista ida ema/pesoal atualizada ho kondisaun atual sertifikasaun nian.
- 2. Gabinete Etika no Deontolojia Profisional hosi PNTL mak sai nudar responsavel iha prosesu Rekonversaun Profisional nia laran hodi:
 - a. Fo lista ida ema/pesoal atualizada mak hetan ona kastigu, hanesan mos loron no pormenor hosi kastigu nian;
 - b. Fo lista atualizada ida ho identifikasaun ba ema/pesoal to'o iha loron mak tama iha vigor dekretu ida-ne'e mak hetan investigasaun kriminal ka desizaun hosi tribunal pendente;
 - c. Fo lista atualizada ida ho identifikasaun ba ema/pesoal to'o iha loron mak tama iha vigor dekretu ida-ne'e mak hetan investigasaun disiplinar pendente.

Artigu 62

Juri atu hili/selesaun

- 1. Membru Governu Makaer/Responsavel ba lidun/area Migrasaun, sei buka hatudu ba efeitu prosesu halo Rekonversaun Profisional, Juri ida forma hosi membru nain tolu, tuir ho termu hirak mak hakerek ona iha Artigu 12 hosi Dekretu-Lei 34/2008.

2. Iha kompozisaun Juri nian sei buka hatama mos representante ida hosi organizasaun internasional ida ho interese relevante iha atividade hirak Migrasaun nian.

KAPITULU VII

DISPOZISAUN IKUS

Artigu 63

Norma no instrusaun komplementar

Membru Governu Makaer/Responsavel ba lidun/area Migrasaun, hosi ninia inisiativa ka ho proposta hosi Diretor Nasional, bele liu hosi despaxu, taka norma ka instrusaun komplementar hirak mak presiza atu halo implementasaun ba diploma ida-ne'e.

Artigu 64

Diviza/insignia

Diviza/Insignia hirak hosi membru sira Kareira Migrasaun hakerek iha Aneksu III ba diploma ida-ne'e no nia halo parte integrante, ne'ebé mak karakteristika teknika rasik hetan definisaun hosi despaxu atu aprova hosi Membru Governu Makaer/Responsavel ba Lidun/Area Migrasaun.

Artigu 65

Tama iha vigor

Diploma ida-ne'e tama iha vigor iha loron tuir mai ba ninia publikasaun.

Hetan ona aprovasaun iha Konsellu Ministru, iha loron 23, fulan Setembru, tinan 2009.

Primeiru-Ministru,

Kay Rala Xanana Gusmão,

Ministra Finansas,

Emília Pires,

Hetan ona promulgasaun iha loron 27, fulan Outubru, tinan 2009.

Bele publika,

Prezidente Repúblika,

José Ramos Horta

UNOFFICIAL TRANSLATION

Aneksu I

(Hare'e ba artigu 4 numir 4)

Postu, Konteudu Funsional no Grau hanesan Funsau/Kna'ar Publika

Postu	Konteudu funsional	Grau hanesan iha Funsau/Kna'ar Publika no Abilitasaun Akadémika ne'ebé nia hetan.
Inspetor –Superior Migrasaun	Inspetor –Superior Migrasaun hanesan ema ofisial sénior ne'ebé fo nia kontribuisaun signifkativa ba rezultadu estratéjiku hirak SM nian. Ofisial ne'e iha lideransa/jestaun senior kona ba unidade iha kompleksidade boot. Ofisial sira ne'e hala'o nível as julgamentu hodi halo kna'ar Migratória no sira iha kbi'it atu representa SM iha soromutu nível as nian eh grupu traballu. servisu ho autonomia no responsabilidade, ne'ebé husu nível ho kapasidade profesional no konñesimentu ne'ebé hetan iha kursu superior.	B Tama ho licenciatura eh tuir rekonversaun profesional hamutuk ho promosaun Ofisial PNTL ne'ebé servisu tinan 5 iha SM/DM.
Inspetor-Xefe Migrasaun	Inspetor –Xefe Migrasaun hanesan ema ofisial senior ne'ebé kontribui ho rezultadu nivel as SM ho lideransa /jestaun kona ba unidade komplexa. Ofisial sira ne'e hala'o julgamentu iha kna'ar migratória ne'ebé iha kbi'it atu foti desizaun iha area/lidun ne'ebé nia responsabilidade. Servisu ho autonomia no responsabilidade, ne'ebé husu	B Tama ho licenciatura ka tuir rekonversaun profesional hamutuk ho promosaun Ofisial PNTL ne'ebé servisu tinan 5 iha SM/DM.

	nível kapasidade ho profisional no koñesimentu ne'ebé hetan iha kursu superior.	
Inspetor Migrasaun	Inspetor Migrasaun hala'ó kna'ar ho diresaun ho limite ne'ebé fo kontribuisaun ba rezultadu hosi SM. Oficial sira ne'e iha responsabilidade ba supervizaun iha divizaun ka postu fronteira nia laran, nune'e sei husu kapasidade atu hola desizaun loro-loron wainhira hala'ó nia kna'ar migratória. Sei husu ba sira kona ba koñesimentu teóriku no pratiku kompativel ne'ebé hetan iha kualifikasaun akadémika hirak no profisional ka esperiensa profisional hanesan.	C Tama ho Baxarelatu ka tuir rekonversaun profisional hamutuk ho promosaun Oficial PNTL ne'ebé servisu tinan 3 iha SM/DM.
Inspetor-Adjunto Migrasaun	Inspetor-Adjunto Migrasaun kontribui ba rezultadu SM, hala'ó kna'ar iha diresaun nia laran. Sira bele hola desizaun bázika migratória no mos bele hala'ó kna'ar hanesan operacional, lojistika no administrativa hirak.	D Tama ho Diploma Pos-Sekundariu ka tuir rekonversaun profisional hamutuk ho promosaun Oficial PNTL ne'ebé servisu tinan 3 iha SM/DM.
Ofisial Migrasaun	Ofisial Migrasaun kontribui ba rezultadu SM, hala'ó kna'ar iha diresaun nia laran. Sira bele hola desizaun bázika migratória no mos bele hala'ó kna'ar hanesan operacional, lojistika no administrativa hirak.	E Tama ba eskola ho tinan 12 ka hanesan.

Aneksu II

(hare'e ba artigu 42 numir 3)

Tabela vensimentu iha kargu diresaun SM nian

Emar/Pesoal diresaun nia	Hanesan funsaun/kna'ar publika	Vensimentu Uluk	Vensimentu Ikus
Diretor Nasional	Diretor Nasional	640	725
Diretor Nasional Adjuntu	Diretor hosi Distritu	520	600

Tabela vensimentu Kareira Migrasaun

	Grau	1	2	3	4	5	6	7	8	9	10
Inspetor-Superior Migrasaun	B						438	451	463	476	489
Inspetor-Xefe Migrasaun	B	374	387	400	412	425					
Inspetor-Migrasaun	C	298	310	323	336	349	361	374			
Inspetor-Adjuntu Migrasaun	D	221	230	238	247	255	264	272			
Ofisial Migrasaun	E	166	174	183	191	200	208	217			

Aneksu III

(hare'e iha artigu 64)

Tabela kona ba diviza/insignia/emblema ba Kareira Migrasaun

Ofisial Migrasaun

Inspetor-Adjuntu Migrasaun

Inspetor Migrasaun

Inspetor-Xefe Migrasaun

Inspetor-Superior Migrasaun

Diretor Nasional Adjuntu Migrasaun

Diretor Nasional Migrasaun

UNOFFICIAL TRANSLATION